

**Akileraarutitigut ilanngaatit il.il.**

Ilanngaatit ataasiakkaat kommuninullu ataatsimut akileraarut, taakku pillugit siunertarineqartut sunniutigisassaallu kiisalu ukiut siuliini annertussusilerneqartarnerisa naatsumik allaaserineqarnerat.

**1. Inummut ilanngaat - § 67, imm. 1.**

Inummut ilanngaat akileraarutissat naatsorsorneqarneranni ilanngaatigineqartussaavoq, tassani siunertaavoq aningaasarsiat (aningaasarsiat akileraaruteqaataasussat) inummut ilanngaammit annerusut kisimik akileraaruserneqarnissaat.

Inummut ilanngaat ukiuni 1975-imit 1986-imut 20.000 kr.-nut annertussusilerneqarsimavoq, 1987-imit (akileraarusersuineramik aaqqissuusseqqinneq) 1991-imut 35.000 kr.-nut, 1992-imit (akileraarusersuineramik allanngiineq) 2004-mut 40.000 kr.-nut aamma 2005-imit (akileraarusersuineramik aaqqissuusseqqinneq) 2021-mut 48.000 kr.-nut annertussusilerneqarsimalluni. Inummut ilanngaat 2022-mi allanngornagu kr. 48.000-inut annertussusilerneqarpoq.

**2. Ilanngaat aalajangersimasoq - § 21, imm. 2.**

Ilanngaat aalajangersimasoq akileraaruserneqarneranni ilanngaataavoq, taanna "ilanngaativissanut" ilanngaammit aalajangersimasumit annerunngitsunut taarsiullugu ilanngaatigineqartarpoq.

Ilanngaat aalajangersimasoq ukiuni 1975-imit 1989-imut 4.000 kr.-nut annertussusilerneqarsimavoq, 1990-imit 1998-imut 6.000 kr.-nut, 1999-imit 2004-mut 8.000 kr.-nut aamma 2005-imit (akileraarusersuineramik aaqqissuusseqqinneq) 2021-mut 10.000 kr.-nut annertussusilerneqarsimalluni. Ilanngaat aalajangersimasoq 2022-mi allanngornagu kr. 10.000-nut annertussusilerneqarpoq.

**3. Aningaasarsiat B-t akileraaruteqaataasussaannngitsut - § 20, imm. 2.**

Akileraaruteqaataasussaannngitsut pineqartillugit siunertaavoq aningaasarsiat B-t taamaallaat akileraarusersorneqartassasut aatsaat aningaasarsiat akileraaruteqaataasussaannngitsut sinnerlugit isertitaqarsimagaanni. Aningaasarsiat akileraaruteqaataasussaannngitsut aalisarnermit, piniarnermit, aallaaniarnermit, savaateqarnermit tuttuuteqarnermillu, eqqumiitsuliornermi sanalunnermillu tunisassianik tunisaqarnermi aamma atuupput. Aalisarnermit, piniarnermit aallaaniarnermit savaateqarnermillu tunisassianik Kalaallit Nunaanni tunisassiorfinnut tunisinermi isertitat, ingerlatseqatigiiffiit, peqatigiiffiit assigisaasaluunniit tunisarinnngippatigit, aningaasarsiatut A-tut naatsorsuunneqassapput.

Aningaasarsiat B-t akileraaruteqaataasussaannngitsut ukiuni 1975-imit 1992-imut 4.000 kr.-nut aamma 1993-imit 2021-mut 5.000 kr.-nut annertussusilerneqarsimapput. Aningaasarsiat B-t akileraaruteqaataasussaannngitsut 2022-mi allanngornagit kr. 5.000-inut annertussusilerneqarput.

**4. Sulisartunut killilimmik akileraartussaataasunut ilanngaat aalajangersimasoq - § 2, imm. 6.**

Ilanngaatit aalajangersimasut akileraarusiinermit ilanngaataapput, taakku "ilanngaativissanut" tamarmiusunut taarsiullugit sulisartunut killilimmik akileraartussaataasunut ilanngaatigineqartarput.

Ilanngaatit aalajangersimasut ukiuni 1975-imit 2020-imut 1.000 kr.-nut angissusiligaapput. Sulisartunut killilimmik akileraartussaataasunut ilanngaat aalajangersimasoq 2022-mi allanngornagu kr. 1.000-inut annertussusilerneqarpoq.

**5. Kommunitut ataatsimut akileraarut - § 63, imm. 2.**

Kommunitut ataatsimut akileraarut akileraarutaavoq immikkut ittoq, siunertaalluni inummut ilanngaatip annertuumik qaffannerata (1987-imi 20.000 kr.-nit 35.000 kr.-nut, 1992-imi 40.000 kr.-nut aamma 2005-imi 48.000 kr.-nut) kingunerisaanik kommunit isertitamikkut annaasaannut matussutaanissaat. Kommunitut ataatsimut akileraarummit iluanaarutit tamarmiullutik akileraarutitigut naligiissaarilluni aaqqissuussamut ilaatinneqarput – inummut ilanngaatip qaffanneqarneratigut kommunit iluanaarutissaraluanit annaasaat akileraarutitigut naligiissaarilluni aaqqissuussaq aqutugalugu kommunitut taamaalillutik utertinneqartarput.

Akileraarutit procentia 1987-imit atuutilersinneqartoq 1987-imit 1991-imut 3 %-imut annertussusilerneqarsimavoq, 1992-imit 2004-mut 4 %-imut aamma 2005-imit 2020-mut 6 %-imut annertussusilerneqarsimalluni. 2022-mi kommunitut ataatsimut akileraarut allanngornagu 6 %-imut annertussusilerneqarpoq.